

Uunga siunnersuut:

Pisortani ataatsimoorussamik IT-mut tunngasutigut suleqatigiinnermut Namminersorlutik Oqartussat nalunaarutaat

Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaat nr. 26, 28. november 2016-imeersumi Inatsisartut inatsisaanni nr. 24, 28. november 2018-imeersumi allanngortinneqartumi § 46a naapertorlugit aalajangersarneqarput:

Kapitali 1

Atuuffia nassuiaatillu

§ 1. Nalunaarut manna kommunit aamma Namminersorlutik Oqartussat ataatsimoorussamik IT-mut tunngasutigut suleqatigiinnerat pillugu atuuffeqarpoq, suleqatigiiffiit tassaallutik pissarsinermut, ingerlatsinermut kiisalu pisortani IT-mut tunngasutigut systemenik ataatsimoorussamik ineriartortitsinermut tunngasut.

§ 2. Pisortani ataatsimoorussamik IT-systemeqarnermi pineqarput IT-systemit Pisortat Digitalimik Aqutsisoqatigiivisa (PDA) siulersuisuisa aalajangigaat naapertorlugi kommunenit aamma Namminersorlutik Oqartussanit atorineqartut ataatsimullu aningaasalersorneqartut.

§ 3. Kalaallit Nunaannut inunnut paasissutissanik suliarinnittarneq pillugu inatsimmi § 42, imm. 2 naapertorlugi pisortani ataatsimoorussamik IT- systemit atorineqartillugit paasissutissanik suliarinnittarnermut isumaqatigiisummi ilanngussaq 1 inatsisitugit malinneqartussaaitaavoq (inunnut paasissutissanik suliarinnittarnermi aqqissuussaq).

Kapitali 2

Pisortat Digitalimik Aqutsisoqatigiivini (PDA) siulersuisut

§ 4. Pisortat Digitalimik Aqutsisoqatigiivini (PDA) siulersuisut aalajangissavaat pisortani ataatsimoorussamik IT-systemit sorliit pissarsiarineqassanersut, kikkut ingerlatsisuussanersut aammalu ineriartortinneqassanersut.

Imm. 2. Tamatuma saniatigut siulersuisut pisinnaatitaaneri Pisortat Digitalinngorsaanermik Aqutsisoqatigiivinit suliaqatigiisummi kiisalu nuna tamakkerlugi digitaliseeriinermut periusissiami aalajangersarneqassapput.

Imm. 3. Siulersuisut aqutsiveqarfiup sinneranit attuumassuteqanngitsuupput.

§ 5. Pisortat Digitalimik Aqutsisoqatigiivini (PDA) siulersuisut ukuninnga inuttaqarput:

- 1) Naalakkersuisut Siulittaasuata Naalakkersuisoqarfiani pisortaaneq.
- 2) Aningaasaqarnermut Naalakkersuisoqarfimmi pisortaaneq.
- 3) Peqqinnissamut Naalakkersuisoqarfimmi pisortaaneq.

- 4) Ilinniartitaanermut Naalakkersuisoqarfimmi pisortaaq.
- 5) Avannata Kommuniani kommunaldirektøri.
- 6) Kommune Qeqertalimmi kommunaldirektøri.
- 7) Qeqqata kommuniani kommunaldirektøri.
- 8) Kommuneqarfik Sermersuumi kommunaldirektøri.
- 9) Kommune Kujallermi kommunaldirektøri.

Imm. 2. Naalakkersuisut Siulittaasuata Naalakkersuisoqarfiani pisortaaq siulersuisuni siulittaasuuvuq.

Imm. 3. Siulersuisuni ilaasortat aningaasarsiaqartinneqanngillat imaluunniit suliassamik isumaginninnerminnut allatut akissarsiaqartinneqassanatik.

Imm. 4. Siulersuisut nammineerlutik suleriaasissartik aalajangersassavaat.

§ 6. Pisortani ataatsimoorussumik IT-systeminik nutaanik pissarsinermi siulersuisunut ilaasortat tamakkerlutik isumaqatigiissapput.

Imm. 2. Pisortani ataatsimoorussumik IT-systeminik nutaanik pissarsinissaq pillugu isumaqatigiittoqarsinnaanngippat, siulersuisut IT-systeminik pissarsinissamut kissaateqartut imminnut attuumassuteqartunut pissarsisinnaapput.

Imm. 3. Imm. 2 naapertorlugu pisortani ataatsimoorussumik IT-mut tunngasutigut systeminik nutaanik pissarsisoqartillugu aningaasartuutit pissarsinissamut toqqaasut agguataassavaat, agguaasseriaaseq § 14-mi aalajangersarneqartoq malillugu.

Imm. 4. Ilaasortat pisortani ataatsimoorussumik IT-systeminik nutaanik pissarsinissamut kissaateqanngitsut kingorna aningaasaliissutissaminnik tamakkiisunik akiliillutik systemimut ilanngussinnaapput.

§ 7. § 6 naapertorlugu aalajangikkani allani siulersuisut ikinnerpaamik arfinillit peqataanerminni aalangiisinnaatitaapput, taakkunannga ikinnerpaamik pingasut kommunineersuussallutik, pingasullu Namminersorlutik Oqartussaneersuussallutik. Tassani amerlanerussuteqartut aalajangigaat atuutissaaq.

Kapitali 3

Pilersitsineq Inussuk IT-llu aqqissugaanera

§ 8. Kommunit aamma Namminersorlutik Oqartussat Inussuk IT-mik pilersitsillutillu ingerlatsissapput, taassumalu Pisortat Digitalimik Aqutsisoqatigiivisa (PDA) siulersuisuisa aalajangigaat naapertorlugu IT-systeminik ataatsimoorussanik pissarsineq, ingerlatsineq, aserfallatsaaliuineq aammalu ineriartortitsinermik qulakkeerinnineq suliassarivai.

§ 9. Inussuk IT-mi ataatsimoorussap aqqissuussaananerani ulluinnarni aqutsineq pisortamit isumagineqarpoq. Pisortaq Pisortat Digitalimik Aqutsisoqatigiivisa (PDA) siulersuisuinit atorfinitsinneqassaaq.

Imm. 2. Pisortaq Namminersorlutik Oqartussat qitiusumi allaffeqarfiata ataani sulisoqarnermut allaffissornikkut aqutsinermut aningaasarsianut isumaqatigiissutit

killissaliussallu atuuttut tunngavigalugit atorfinitsinneqassaaq soraarsinneqassallunilu.

Imm. 3. Quillersaqarfiup akisussaaffii suliassaalu pillugit aalajangersakkat erseqqinnerusut siulersuisunit aalajangersarneqassapput.

§ 10. Pisortaq Inussuk IT-mi sulisunik atorfinitsitsisassaaq soraarsitsisassallunilu.

Imm. 2. Sulisut Namminersorlutik Oqartussat qitiusumi allaffeqarfiata ataani sulisoqarnermut allaffissornikkut aqutsinermut aningaasarsianut isumaqatigiissutit killissaliussallu atuuttut tunngavigalugit atorfinitsinneqassapput soraarsinneqassallutillu.

§ 11. Tjenestemandinik atorfinitsitsinermi soraarsitsinermilu siulersuisut imaluunniit pisortaq tamanna pillugu Naalakkersuisunut inassuteqassapput.

§ 12. Inussuk IT aqqissuussaannermi Naalakkersuisut ataanniippoq namminersortuusoq, suliassaqarfiit agguataarneqarnerat pillugu kaajallaasitaq takujuk (Suliassaqarfiit agguataarneqarnerat)

Kapitali 4

Inussuk IT-p aningaasalersorneqarnera

§ 13. Inussuk IT ukiumoortumik aningaasaliissutit aningaasanut inatsimmi immikkoortinneqartut iluanni suliaqarnerminik ingerlatsissaaq.

Imm. 2. Ukiumut aningaasaliiffiusumut pisussamut missingersuutit, ukiumoortumik ataatsimoortumik tapiissutinut isumaqatigiissuteqarnerup peqatigisaanik, isumaqatigiissutigineqassapput. Kommunit akiligassaat aningaasaliissutinut imm. 1-imi taaneqartunut aningaasanut inatsimmi Inussuk IT-mut immikkoortinneqartunut, nuunneqassapput.

§ 14. Inussuk IT-p IT-systeminik ataatsimoorussanik pissarsineranut, ingerlatsineranut, aserfallatsaaliuineranut aamma ineriartortitsineranut aningaasartuutai kommuninut 50 procentimik aammalu Namminersorlutik Oqartussanut 50 procentimik agguarneqassapput.

Imm. 2. Kommunit akiligassaat innuttaasut amerlassusaat 1. januar ukiup aningaasaqarfiusup siornani naatsorsorneqartut malillugu agguarneqassapput.

Kapitali 5

Missingersuutit, naatsorsuutit aamma kukkundersiuneq

§ 15. Inussuk IT-p ukioq naatsorsuusiorfia tassaavoq ukioq aningaasaliiffiusoq.

§ 16. Inussuk IT ukiup aningaasaliiffiusup tullianut aamma ukiunut missingersuusiorfiusunut pingasunut ingerlatsinermut sanaartormullu missingersuutitut siunnersuummik, ukiut tamaasa Naalakkersuisunut aamma kommuninut tunniussisassaaq.

Imm. 2. Ingerlatsinermut sanaartornermullu missingersuutitut siunnersuut, pissarsinermut, ineriartortitsinermut, aserfallatsaaliuinermut ingerlatsinermullu suliaassat nassuiarneqarnerannik kiisalu sunniuteqarluarnerulersitsinermi iluanaarutaasussatut missingersuinernik imaqassaaq.

Imm. 3. Naalakkersuisut ingerlatsinermut sanaartornermullu missingersuutitut siunnersuutip tunniunneqarnissaanut piffissamut killissaliussamik aalajangersaasinnaapput.

§ 17. Inussuk IT, Namminersorlutik Oqartussat qitiusumi allaffeqarfiata ataani suliffiup iluani allaffissornermik aqutsinermut, naatsorsuutini allattuinermut aamma aningaasaqarnerup aqunneqarneranut maleruagassani malittarisassanilu sukkulluunniit atuuttuni, pineqartunut ilaavoq.

Imm. 2. Suliffiup iluani allaffissornermik aqutsineq, naatsorsuutini allattuineq aamma aningaasaqarnermik aqutsineq, immikkoortortaq sinnerlugu Naalakkersuisut isumagisaraat. Tamatumunnga aningaasartuutissat Naalakkersuisunit aalajangersarneqassapput aammalu § 12-mut naapertuuttumik agguarneqassallutik.

§ 18. Inussuk IT ukiup naatsorsuusiorfiusup siuliani suliaqarnini pillugu Naalakkersuisunut aamma kommuninut allaganngorlugu nassuiaammik ukiut tamaasa suliaqartassaaq. Nassuiaat nunap karsiata naatsorsuutaasa kukkunersiorneqarneranni ilaatinneqarsinnaanngorlugu, ilusilerlugu tunniunneqassaaq.

Kapitali 6

Atuutilernera aamma atorunnaarsitsinermut ikaarsaarnermullu aalajangersakkat

§ 19. Nalunaarut ulloq x.xx 2022 atuutilerpoq.

Imm. 2. Peqatigitillugu pisortani ataatsimoorussamik aningaasaqarnermut aamma sulisoqarnermut allaffissornikkut IT atorlugu periaaseq pillugu Namminersorlutik Oqartussat nalunaarutaat nr. 9, 24. juli 2019-imeersoq atorunnaarpoq.

§ 20. (Pisariaqassappat ikaarsaarnermut aalajangersagaq)

Namminersorlutik Oqartussat, ulloq x.xx 2022

Múte Bourup Egede
Naalakkersuisut Siulittaasuut

/ Hans-Peder Barlach Christensen